

四庫全書

史部

欽定四庫全書

史部

赤城志卷二

詳校官監察御史_臣沈孫璉

檢討_臣德生覆勘

總校官檢討_臣何思鈞

校對官中書_臣高 中

謄錄監生_臣孫大森

欽定四庫全書

史部十一

赤城志

地理類三

都會郡縣之屬

提要

臣等謹案赤城志四十卷宋陳耆卿撰耆卿字壽老號貧窻台州寧海人登嘉定七年進士官至國子監司業其事蹟不見於宋史惟謝鐸赤城新志稍著其仕履而亦不詳今以所著貧窻集考之則嘉定十一年嘗為

青田縣主簿嘉定十三年為慶元府府學教授又趙希弁讀書附志稱耆卿集中沂邸牋表為多案宋史孝宗孫吳興郡王柄追封沂王其嗣子希瞿寧宗嘗立為皇子即濟王竑耆卿必嘗為其府記室而希弁略其文也此為所撰台州總志以所屬臨海黃巖天台仙居寧海五縣條分件繫分十五門其曰赤城者文選孫綽天台賦稱赤城霞起以建標

李善注引支遁天台山銘序曰往天台當由
赤城山為道徑又引孔靈符會稽記曰赤城
山石色皆赤狀似雲霞又引天台山圖曰赤
城山天台之南門也梁始置赤城郡蓋因山
為名者卿此志即用梁郡名耳者卿受學於
葉適文章法度具有師承故敘述咸中體裁
明謝鐸嘗續其書去之遠甚舊與者卿書合
編今析出別存其目陳振孫書錄解題載此

志之前有圖十三此本乃無一圖殆傳寫者
艱於繪畫久而佚之矣乾隆四十五年七月

恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

赤城志卷一

宋 陳耆卿 撰

地里門一

禹別九州周分百縣州與縣之名昉此然以受地則廣以居民則富非若今之州縣蹙且鮮也台自漢萌芽僅號東南一尉至後漢始稱縣焉吳始稱郡焉以迄于今上下千餘載余以十道圖九域志及輿地寰宇諸書攷之離合廢興殆不知幾變也即是以觀天下之大其沿

革可勝道哉然自唐以前頗號僻左本朝南渡後陶和
染醇文物滋盛乃始以勝壤名天下而官守者亦樂之
焉地之顯晦時邪人邪余故博採以著于篇分叙州叙
縣

叙州

上台州禹貢揚州之域春秋戰國時皆為越地自王無
諸為楚所并秦滅楚為閩中郡閩君搖率越人佐
漢伐秦漢立搖為東海王都東甌高帝六年為荆

國十二年更名吳封劉濞為王其地屬焉孝景三年濞反漢擊之濞敗走保東越東越殺濞濞子駒怨東甌殺其父走閩越勸之擊東甌建元三年閩越圍東甌武帝遣嚴助發兵往救閩越引兵去東甌乃舉國徙江淮間以其地為回浦縣屬會稽郡為東部都尉

按郡國志以章安縣東甌鄉為東部侯國通典云東部今臨海是也二說

皆云東部獨漢地里志注回浦南部都尉治

光武時改回浦為章安縣

永和三年析縣之東甌鄉置永寧縣興平元年析

章安永寧置松陽始平縣吳赤烏二年析永寧置
羅陽縣太平二年析章安置臨海縣以會稽東部
立臨海郡治臨海取郡東北臨海山而名屬揚州

尋徙治章安晉武帝太康元年改始平為始豐羅

陽為安固析臨海之北置寧海縣

按寧海土風志縣本漢回浦鄞

二縣太元二年裂鄞之八百戶安北鄉二百步置寧海縣與前說微不同

四年析安固

置橫陽縣明帝太寧元年析永寧松陽安固橫陽

置永嘉郡亦屬揚州穆帝永和三年析始豐置樂

安縣宋孝建元年析揚之五郡為東揚州臨海與
馬梁武帝改為赤城郡尋復為臨海縣至德元年
復為郡治始豐隋開皇九年平陳郡廢復為臨海
縣屬永嘉郡廢始豐寧海復入臨海十一年置臨
海鎮於大固山移其縣於鎮大業四年沈法興擅
立為海州唐武德四年平李子通以臨海縣置台
州取天台山而名

此按唐史係四年而壁記序乃云武德二年東南面行臺僕射

杜伏威改海州為台州舊經又云五年改為台州二說不同當以史為正復置始豐寧

海縣六年陷于輔公祐七年賊平仍置台州省寧
海入章安八年廢始豐樂安章安三縣入臨海貞
觀六年改隸括州都督府八年復析臨海置始豐
上元二年復置永寧永昌元年復置寧海神龍二
年析寧海置象山縣天授元年改永寧為黃岩天
寶元年改台州為臨海郡乾元元年復為台州隸
浙江東道肅宗上元二年改始豐為唐興析臨海
復置樂安廣德元年郡徙治始豐二年以象山隸

明州大厯十四年改隸浙江西道僖宗光啓三年

陞德化軍

詳見魯洵作杜雄墓碑洵乃雄吏時為德化軍判官者也嘉定中黃岩永寧江

有洵于水者拾一銅印其文曰台州德化軍行營朱記

唐末吳越王錢鏐有

其地梁開平三年改唐興為新興

見徐靈府天台山記注 錢

氏寶正五年改樂安為永安後唐同光初改新興

復為始豐晉天福初改台興國朝建隆初復為天

台

按天台縣經云梁時已改曰天台及五代史無之

太平興國三年錢氏

納土入版圖隸兩浙東路前後沿革皆即臨海縣

為州治景德四年改永安為仙居領縣五與兩浙
道皆為南斗須女之分其境壤道里之數各附于
左

州境

州在東京東南二千九百二十五里行在東五百四里
東西三百九十里南北三百九十里是為提封之
境東一百八十里入海西二百一十三里蒼嶺入
處州南一百三十九里盤山入溫州北一百四十

五里關嶺入紹興府是為四正之境東南二百九十二里入海西南一百九十二里括蒼山入處州東北三百二十五里礪蒼山入慶元府西北二百九十四里大盆山入婺州是為四隅之境多陸程西二十里至三江由江入溪八十里入仙居縣九十七里入天台縣南大江東南流一百里入黃巖縣又八十里出海門達溫福諸邊海州軍此水程也

叙縣

臨海

望臨海縣本漢回浦屬會稽郡東漢改曰章安吳太平中
析章安置臨海縣屬臨海郡晉宋因之後省入章
安隋開皇改為臨海屬處州後屬永嘉郡唐武德
復置章安縣後廢章安復為臨海

縣境

縣在州東南二百三十步東西二百四十里南北一百

一十五里是為提封之境東一百八十里牛頭山
入海西七十里黃耆嶺入仙居縣南四十五里黃
土嶺入黃巖縣北六十五里杜潭嶺入天台縣是
為四正之境東南一百二十六里海門山西南五
十里括蒼山連燈壇山入仙居縣東北六十里寧
和嶺入寧海縣

此乃舊路今只循桐岩嶺而行
以嶺脊為界去縣五十五里西

北六十五里黃振嶺入天台縣是為四隅之境多

陸程水程與州別

黃巖

望黃巖縣本漢永寧縣唐上元析臨海置屬台州天授元年更今名

縣境

縣在州南六十里東西三百一十里南北一百四十三里是為提封之境東六十里海門山入海西二百五十里蒼山入仙居縣南九十里嶠嶺入樂清縣北一十里戍鋪嶺入臨海縣是為四正之境東南

二百一十五里大閭山入樂清縣西南三百里
塵山入永嘉縣東北六十里赤山村西北七十里
義誠鄉皆入臨海縣是為四隅之境多陸程南官
塘九十里至嶠嶺入樂清縣北大江二十里至亭
山入臨海縣又一百里入州由永寧江東北三十
五里入海口東南三百二十里至上崎入溫州此
水程也

天台

上天台縣本漢始平縣晉太康改始豐屬臨海郡宋因之隋廢唐武德復置屬海州後廢貞觀復置上元改唐興梁開平改新興後唐同光復名始豐晉天福改台興國朝建隆初改今名

縣境

縣在州西九十里東西二百二十九里南北七十二里是為提封之境東四十里筋竹嶺入寧海縣西一百八十三里大盆山入東陽縣南二十五里杜潭

入臨海縣北五十里石壘寨入新昌縣是為四正之境東南四十里黃振嶺入臨海縣西南一百里紫箴山入仙居縣東北六十里靈墟入海西北四十里關嶺鋪入新昌縣是為四隅之境多陸程東南由始豐溪四十七里入臨海又東北七十里入州此水程也

仙居

上仙居縣本晉樂安縣宋因之唐武德廢上元復置錢

氏改永安國朝景德更今名

縣境

縣在州西九十里東西一百二十里南北一百四十里
是為提封之境東三十里界嶺入臨海縣西九十
里風門入縉雲縣南一百里道耆山入永嘉縣北
五十里黃榆山入永康縣是為四正之境東南一
百五十里五部山入黃岩縣西南一百里界遶山
入縉雲縣東北八十里盧坑山入天台縣西北一

百一十五里郭坦山入永康縣是為四隅之境多
陸程南大溪自縣西五十里至石姥嶺東南入臨
海界此水程也

寧海

緊寧海縣本吳臨海縣地晉太康析置隋開皇廢唐武
德析臨海復置屬海州後省入章安永昌復置

縣境

縣在州東南一百七十五里東西一百九十里南北二

百六十五里是為提封之境東一百三十里西溪
嶺入象山縣西六十里筋竹嶺入天台縣南一百
一十五里寧和嶺入臨海縣北六十里柵虛嶺入
奉化縣是為四正之境東南二百五十里牛頭洋
入臨海縣西南八十里白溪源入天台縣東北一
百二十里紫溪嶺入象山縣西北八十里杉木嶺
入奉化縣是為四隅之境多陸程港自縣東便風
一潮過五嶼洋至牛頭洋小泊潮入海門一日夜

至州此水程也

赤城志卷一

欽定四庫全書

赤城志卷二

宋 陳耆卿 撰

地里門二

自古建郡若邑倚城以為命然必擇勝地焉今章安鎮側有古城蓋吾州舊蹟也荒雉墜堞已隨秋草然亦疑其遠州比海魚龍所腥非高塹可久之地以今城壘騁目而望据大固山介天台括蒼間中峯對峙如入几席天台仙居二水別流至三江口而合縈紆演迤環拱其

郭岩光川容吞吐掩映於煙雲縹緲之際真足以奠城社表宅里聚廛市以雄跨一方矣

城郭

州

城按舊經周回一十八里始築時不可攷太平興國三年吳越歸版圖隳其城示不設備所存惟繚牆後再築慶厯五年海溢復大壞部使者田瑜以聞詔新之乃命太常博士彭思永攝州事命縣令范仲

溫等分典四隅從事蘇夢齡等總其役三旬而畢
明年元守絳至迺因新城增甃之作九門捍外水
之怒十竇窻疏內水之壅又鑿梁贊城廝為三支
閱歲訖工是秋水不為災至和元年復大水城不
沒者數尺孫守礪再加增築嘉祐六年大水復壞
徐守億謂城南一帶當水衝用牛踐土而築之每
日穴所築地受水一孟黎明開視水不耗乃止熙
寧四年錢守暄又累以密石且慮水齧其足遂浚

湖以其土實之乾道九年火及閩淳熙二年趙守
汝愚又繕築焉先是郡有壯城遇水患合司其役
已乃屬役於士庶吏誅求不饜則据撾鞭箠至有
殞於非命者公從州士請歸其役於壯城民用以
寧三年秋大雨城又幾圯尤守衷極力隄護事竟
復修城全邦人歌之按故基東自小鑑湖循清
心嶺而南縈抱舊放生池直接城山嶺古通越門
土地廟處蓋今湖昔地皆閩闔中物也後乃徙而

之西縮入里餘衆謂起元守絳今按元雜記但載修城無徙入之文後按汪泌共樂堂詩歷叙城事

有外遺數百家室屋鱗參差之語意其為錢守暄

也

全篇見東湖

嘉定十六年齊守碩復經界有以故基

為言者亟遣官吏按視則知城趾廣踰四丈中有二斗門瀉水遺蹟具在而以居人奄據或田或園歲久懼愈湮迺於其中酌存丈許旁揭牌以為表識其奄據者貫不治而聽其承佃如官店基法焉

新城既全而舊城且不泯矣城今有七門各冠以樓南曰鎮寧門樓名神秀曰興善門樓名超然東曰崇和門樓名惠風西曰括蒼門樓名集仙東南曰靖越門樓名靖越西南曰豐泰門樓名霞標西北曰朝天門樓名興公蓋自尤守以前城凡八修繼是雖間修非大役故不書

呂成公祖謙修城記云臨海郡南東西三

方岸江湖秋水時至北限大山蹙不得騁怒鬣隄足生聚凜凜時城以為命距海餘百里逋亡剽俠之所曹惡歲輒睚眦州淑脾睨郭郭徵警者不敢弛析故開修之政在是郡為首務蓋所以遠菑害

銷姦萌非徒區畫封表備侯邦之制也慶歷之水
幾不為郡元章簡公絳來守城復立宣和中盜發
仙居闔虛深入突薄欲登時則有戶掾滕君膺帥
厲吏士圍以方略寇不為患父老紀焉乾道九年
里旅不戒於火延及郡城堵墮甃弛徑踰無禁蓄
氣未格民謠不寧間一歲大吏趙侯汝愚自信徙
鎮暇日循行牆落屬丞掾而告之曰置守所以衛
民顧屏蔽廢徹若是其何以待不虞土功於古雖
有常律傳春秋者復出啓塞從時之例豈非城闔
之啓閉寔有邦之大紀隨時築治有不得已者
邪況壯城之卒月粟歲帛凡以為此益其廩而寬
其程宜無不可於是軍事判官蘇延壽受役要司
輦輦金穀之稽兵馬都監胡勝督我巡功察其勉
與不勉者命羣有司各保其所奠地守傳衆力埤
增卑薄塗塞空卻環城諸門作新者四曰鎮寧曰
興善曰豐泰曰括蒼修舊者五曰崇和曰靖越曰

朝天曰順正曰延慶起淳熙二年六月癸酉訖閏九月戊辰累日積功凡一萬五千三百七十有六大抵取具於壯城之籍間民願即工者厚贍之不欲勿彊會其數眎役兵財十之二鍛斷鍰埴黝堊之工畀僦直如其素醪醴之饋勞來之吏相及於道其材瓦石暨之用積二十一萬七千九百錢以資計米以石計者合四千六百有奇維侯憂民急病之意既達於下而精知周慮又足以綜理之故公無羨費人無留力工無餘技役事首尾歷再時版市並作觀堞崛興而近郊之氓初未嘗釋隴畝也始侯之至詔奉計最朝十月報政之期甫半歲而贏或謂是邦特侯假道休沐之地繕營之鉅者必姑存以須後乃獨於入國阡陌未習之時驟舉力政百年之蹟還於指顧邦人德其賜而樂其成請書勞於石抑不知因事而功見已事而跡泯一壘培之緒業於侯何有哉至於不以久暫易意眇

然長處於耳目之外以無負於寄委識
此者蓋亦鮮矣遂書以諗台之君子

子城按舊經周回四里始築時不可攷或云州治舊在

大固山上有子城故趾焉後隨州治徙今處其門

有三南曰譙門上有樓不名東曰順政門樓名東

山西曰延慶門今名迎春

城之南內外號裏班內班舊傳錢王徽守台胡

進思自此迎立之有班直分寓于此故名

臨海

城按縣須知周回二百九十五步按縣治附州城他無

郭郭或云今左右繚牆沿城隍廟至天台館達上古巷其步數實合意舊有城而後易為牆也

黃巖

城按舊志云周邑九里三十步又云周回四百五十步唐上元中築今皆無攷

天台

城周回四百步吳永安中築按甌刻宣和三年重修今稍頽圯有二門東曰應台西曰通越

仙居

城周回六百步唐上元二年築國朝宣和寇亂統制姚平仲張思正駐兵於此因再築焉

寧海

城周回六百步舊在海遊唐永昌元年徙今地

或云唐大厯間

四隅舊各有門後廢令陳宗仁於西北驛道立其二曰望台曰朝京

鄉里

臨海

一十五鄉
四十四里

大固鄉在縣東祥符中管里一曰交里今管里六

丘祥

舊名休祥紹興中道士費德泓得晉碑土中猶以此名里後避真廟舊諱改今名

臣公

恩義

崇和

衮繡

慶元六年葉守鑑為謝丞相深甫立

世衮

嘉定元年李守兼為錢丞相象祖立

興國鄉在縣西北祥符中管里一曰瓦窰今管里二

慶善

舊名迎恩因陳貽範有藏書樓曰慶善後同弟貽序中第子師恭亦舉八行故改今

名

丹丘

義誠鄉在縣南一十里祥符中管里一曰新城今管里

三

按唐乾寧間曾洵作杜雄墓銘義字下作誠字俗呼為城者誤

正節

按杜雄墓銘云葬于義誠鄉正節里則得名久矣

豐化

按張滌作駱延威妻杜氏墓誌云光化二年葬臨海縣官政鄉風化里風與豐同音

今恐訛也所謂官政鄉者得非今之義誠乎

承光

遂仁鄉在縣東南二十五里祥符中管里一曰江上今

管里五

永固

蓋竹

承明

白鷗

以山得名

長石

清化鄉在縣東三十里祥符中管里一曰山後今管里

二

遇明

修景

太平鄉在縣西三十里

分上下二扇

祥符中管里一曰若溪

今管里二

善政

懷表

重輝鄉在縣東北三十里祥符中管里一曰油溪今管里二

合從

修謹

長樂鄉在縣東南四十里祥符中管里一曰磧村今管里三

正教

上義

連碧

明化鄉在縣東南四十五里

分上下二扇

祥符中管里一曰

青令今管里二

孝遜

欽田

安樂鄉在縣東北五十里祥符中管里一曰路前今管

里三

興善

道德

懷善

延壽鄉在縣東北五十里祥符中管里一曰大東今管

里三

廟善

干山

延祚

靜安鄉在縣西北五十里祥符中管里一曰七孺今管

里四

按靈鷲祖師幼璋遇異僧告云尋靜而棲遇安即止璋遂為靜安鄉初福田院俗以靜為

靖誤也又此鄉今有地名七孺或傳古有七孺人居之祥符以此名里亦為是歟

湖平

王震

大石

小石

于公鄉在縣東六十里祥符中管里一曰涇山今管里

三

清溪

北湖

纂化

保樂鄉在縣東南一百一十里

分西南二扇

祥符中管里一

曰百家今管里二

按祥符中僧顧瀉撰光相院記云師臨海寶樂人今以寶為保

亦恐訛也

永福

崇仁

承恩鄉在縣東一百五十里祥符中管里一曰又口今

管里二

廣濟

礪石

黃巖

一十二鄉
四十里

仁風鄉在縣東二百步管里二

光澤

安寧

三童鄉在縣西一十里管里二

建平

善政

永寧鄉在縣南一十五里管里三

砂門

仙山

善化鄉在縣北一十里管里五

善鄰

親仁

道林

石步

臨海

備禮鄉在縣西北一十五里管里四

石步

新昌

建城

大興

飛鳧鄉在縣東南二十里管里七

親仁

海門

懷禮

安仁

安樂

甘泉

青鳧

靖化鄉在縣西南二十里管里二

按祥符圖經有永泰無靖化或云永泰蓋

哲廟陵名意以
是改為靖化也

苦竹

浮南

靈山鄉在縣南三十里管里二

貴豐

塘下

馴雉鄉在縣西南三十五里管里五

古城

仙岩

湖南

湖北

白塔

繁昌鄉在縣南七十里管里三

舊名萬歲政和八年以鄉民陳丑兒妻一產四

子州以聞
詔改今名

贊善

橫嶼

回浦

來遠鄉在縣西南九十里管里二

清江

浮山

太平鄉在縣東南一百里管里四

三門

練溪

白水

遊嶼

天台

四鄉一十二里

太平鄉在縣東管里三

五支

三歸

橘溪

永保鄉在縣西管里三

按崇道觀元命殿前石香臺鐫云咸平三年天台縣寶祚鄉塘

西保士庶置詢之父老即此鄉也豈吳越時鄉名而咸平後易之耶塘西乃山裏宋氏所居之地名

定公

長松

兩岐

祥鸞鄉在縣西二十五里管里三

桐栢

大固

興正

積石鄉在縣西三十五里管里三

三異

曲池

同仙

仙居

六鄉三十一里

昇平鄉在縣郭東西管里六

永欣

白水

以溪水湍流而白色故名

新建

石牛

以有怪石狀似牛橫枕溪中流故名

狀元

舊名安仁開禧元年令趙汝遠以胡謙魁特科改今名

孝義

慶元二年令趙幼聞以吳沆母病封股而名

慶雲鄉在縣東一十里管里三

浮都

班溪

甘露

按純熙觀記云葛元於括蒼洞煉丹有慶雲甘露之瑞故以慶雲名鄉以甘露名里

云

開元鄉在縣西二十里管里六

羌山

以韋羌神
靈驗故名

莒溪

元文

高遷

靈峯

折桂

以吳給事希兄弟子
姪相繼擢第而名

歸仁鄉在縣東南二里管里七

清湖

舊傳以湖
水清故名

隱賢

清河

石感

武德

誠信

吉陽

清風鄉在縣西四十里管里七

永昌

薦正

甘泉

飯政

紫岩

以紫岩山石
產紫草故名

辛昌

溫泉

遂寧鄉在縣西六十里管里二

懷化

赤城以山得名

寧海

六鄉一十九里

朱開鄉在縣東北七里管里五

廣度

辟邪

時康

堠城

橫溪

連理鄉在縣西南一十里管里一

父老云溪南昔有櫟成林一夕風雨林中

作數百人聲旦視枝幹皆連理故以名鄉

宣陽

永康鄉在縣西南三十里管里三

新建

清溪

桐栢

仙巖鄉在縣南六十里管里三

井山

梅枝

合歡

新寧鄉在縣北七十里管里二

仙人

舊名閩風

善政

寧和鄉在縣南七十五里管里五

清溪

懷遜

奉化

萬歲

新進

坊市

州

狀元坊在州東一里以陳侍郎公輔釋褐第一故名

登俊坊在州東南九十步以州學在焉故名

惠化坊在州東二百步

春祺坊在州南一百三十步

移風坊在州東南二百步以臨海縣在焉故名

順昌坊在州東三百步

通遠坊在州東南三百五十步以稅務在焉故名

嘉定十六

年居人自此坊側重甃衢路至州橋得舊甗二一
鐫端拱四年一鐫淳化元年又石版內鐫景德寺
僧簡瓊再修今舊經有景德寺
德寺砌街記蓋此時也

延康坊在州東南一里

永平坊在州南一里

寶華坊在州東南一里二百步以報恩寺在焉故名

右十坊舊有之後廢嘉定四年黃守熳重修

狀元坊在州南七十五步嘉泰二年黃守英雋以葉淙

魁武科故名

悟真坊在州東北二百五十步慶元三年葉守甄以張

平叔居此著悟真篇名今有祠

興賢坊在州東南一里嘉定十五年齊守碩建以貢院在焉故名

美德坊在州東北一里開禧三年李守兼以錢丞相居此故名

節孝巷在州東一百五十步淳熙二年尤守衮建以朱伯履妻陳氏旌表故名

戶曹巷在州東一里以唐鄭虔為戶曹日居此故名

杜甫

題鄭著作詩云台州地濶海冥冥雲水長和島嶼青亂後故人雙別淚春深逐客一浮萍酒酣懶舞

誰相拽詩罷能吟不復聽第五橋東流恨水皇陂
岸北結愁亭賈生對鵬傷王傅蘇武看羊陷賊庭
可念此公懷直道也需新國用輕刑禍衡實恐遭
江夏方朔虛傳是歲星窮巷悄然車馬絕索頭乾
死讀書螢所謂窮巷即此也又有詩云天台隔一
江風浪無晨暮鄭公縱得歸老病不識路昔如水
上鷗今如置中兔性命由他人悲辛但狂顧山鬼
獨一脚蝮蛇長如樹呼號傍孤城歲月誰與度從
來禦魑魅多為才名誤夫子嵇阮流更被時俗惡
海隅微小吏眼暗髮垂素黃帽映青袍非供折腰
具平生一盃酒見我故人遇相望
無所成乾坤莽回互餘詩不盡載

綦內翰巷在州東南二百八十步紹興中綦內翰室禮

居之故名

杜家巷在州東南三百步先是杜祁公之先名叔廉者
築室於此其遠孫穎復居之故名

黃甲巷在州東南三百四十步天聖中以丞聽小吏王
珪發憤讀書同兄琥登科故名

大街頭市在州東二百步

小街頭市在州東三百步

尼巷口市在州南三百步

稅務前西市在州南三百五十步

報恩寺西市在州南一里二百步

朝天門內市在州西八十步

朝天門外市在州西一百二十步

括蒼門外市在州西二百五十步

鎮寧門內市在州南一里五十步

鎮寧門外市在州南一里八十步

興善門外市在州南一里三百步

臨海

上台坊在縣東五里慶元六年葉守鎮建以謝丞相居

此故名

柘溪市在縣東二十里

路口市在縣西二十里

大田鎮市在縣東三十里

絢珠市在縣東四十里

東陳市在縣東四十五里

章安鎮市在縣東南一百二十里

杜瀆鎮市在縣東一百八十里

黃巖

清鎮坊在縣西二十步

欽賢坊在縣北七十步熙寧中以賢良徐其姓者居之

故名

仁風坊在縣北八十步

新羅坊在縣東一里舊志云五代時以新羅國人居此

故名

右四坊熙寧九年令范世文建

通仙坊在縣南八步以面直委羽山故名

巖瞻坊在縣東一十八步

拱秀坊在縣西二十五步

梯雲坊在縣東三十二步以楊似雲葉應輔中第故名

慶善坊在縣東三十五步

叢桂坊在縣東四十步舊名桂枝以左琨兄弟中第故

名

阜民坊在縣東四十步

太平坊在縣西六十步

景賢坊在縣東七十步以林森居之故名

壽寧坊在縣北七十步

朝元坊在縣西七十五步以定光觀在焉故名

興善坊在縣北九十步

里仁坊在縣南一百步

孝行坊在縣南一百二十步舊名延慶以至道中郭琮

居此故名

教善坊在縣南一百二十步

振文坊在縣南一百三十步以縣學在焉故名

奎文坊在縣南一百五十步以明因寺賜御書故名

右十七坊嘉定十一年令陳夢建建

闕市在縣西南一十五里

小澧市在縣西三十里

新安市在縣東南三十里舊名路橋

于浦市在縣東南六十里

夾輿市在縣東南七十里

天台

阜民坊在縣西北六十七步以其面南取阜財之義而

名

保寧坊在西北八十七步

崇化坊在縣東南二百三十一步以其通縣學故名

利涉坊在縣東南三百一十七步

右四坊嘉定七年令丁大榮建

惠泉坊在縣南一十步以舊闡法寺井在焉故名舊名

建平

訪真坊在縣西北六十七步以通桐栢路故名舊名集

賢

旌孝坊在縣東南九十七步舊傳溪流夜漲有一嫗憊

不能逃其稚子縛木以濟之故名舊名孝義

鎮安坊在縣東北一百三十步以其近鎮安廟故名舊

名福庭

玉京坊在縣西北一百四十八步以其通玉京洞故名

舊名祥鸞

嘉祥坊在縣西南一百八十步舊名靈溪

右六坊嘉定七年令丁大榮重建

縣市在縣西南七步

飛泉市在縣西二十五里

仙居

闡科坊在縣南一十步以梅廷瑞中乙科故名

狀元坊在縣南一十步以陳正大魁武科故名

折桂坊在縣南五十步以吳給事蒂兄弟中第故名

棣華坊在縣西一百三十步以王孫震兄弟登右科故

名

友于坊在縣西南一百五十步以郭堯卿遜世賞于弟

故名

石井市在縣南一十五里

石燒市在縣東二十五里

田頭市在縣西二十五里

白塔市在縣西三十里

礮灘市在縣西五十里

寧海

振名坊在縣東五步舊名仙隱以尉解在焉

擷英坊在縣東五步舊名濯纓

通德坊在縣西北四十步

廣度坊在縣東北九十步

淨因坊在縣東北一百步

集禧坊在縣東南一百一十步

德生坊在縣東北一百三十步河岸舊名魚樂


毓秀坊在縣東北一百九十步

登俊坊在縣西南二百步以學在焉故名舊名崇儒

叢桂坊在縣東南一里

朝宗坊在縣東北一里

港頭市在縣東南一十五里



赤城志卷二

欽定四庫全書

史部
赤城志卷三
四

詳校官監察御史_臣沈孫璉

檢討_臣德生覆勘

總校官檢討_臣何思鈞

校對官中書_臣高中

謄錄監生_臣孫大森

欽定四庫全書

赤城志卷三

宋 陳耆卿 撰

地里門三

自城郭至坊市居者之適也自館驛至津渡行者之便也郡自天台徑越自黃巖徑溫自寧海徑明自仙居徑括車聯轂擊經行者無藝晝涉夜憩詎容頃刻失其節哉余觀南方治一橋費緡錢輒十數萬他郡館舍亦輝敞相望是州獨寥寥焉傑然者一二而已然因其舊而

密菁之母俾滋壤自足以紉吾邦之闕而不必深豔乎
其他也即是一端亦足以觀政矣

館驛

州

天台館在州南一百三十步俗名行衙乾道九年火淳
熙三年尤守衷重建嘉定十六年齊守碩重修

丹丘驛在州東南一里舊傳葛元煉丹於此故名乾道

九年火今為民居

按係緡賦仍羽人於丹丘丹丘
今寧海有之天台記載晉虞洪

入丹丘山遇丹丘子求茗則得名舊矣今
臨海有丹丘觀寧海有丹丘院亦此義也

嘉祥館在州東五十步舊號小行衙嘉泰四年廢後併
入添差通判廳今廢

臨海

泰安驛在縣西北四十七里慶元中葉守鎮重建今廢

洪文惠公适曉發此驛詩云秋夢不能曉起行山
徑迷小車驚宿鷺列炬誤鳴鷄冷怯霜華重光瞻
斗柄低金庭有佳
處芳桂想幽棲

橫溪驛在縣東北五十里今廢

黃巖

亭山館在縣南三里瀕河慶元五年令常濬孫建

仁風驛在縣北三里舊名永寧乾道三年令周蒙更今
名

白峯驛在縣南四十五里今廢

天台

赤城驛在縣西南二百步

飛泉驛在縣西二十五里今廢

靈溪驛在縣東二十里舊路由此入京今亭頭是也後

改自東門遂廢

唐鄭巢夜泊有詩云孤吟疎雨夜荒館亂峯前曉鷺棲危石秋萍滿

敗船溜從華頂落樹與赤城連已有求閒意相期在暮年

仙居

安洲驛在縣西三百步舊名括蒼紹興二十六年令梅

克明建後廢嘉泰二年令林岳重建以近安洲山

更今名

樓叅政鐫為之記

蒼頭驛在嶺上今廢

寧海

迎恩驛在縣東一百步今廢

妙相寺驛在縣東五十步嘉定六年令鄭如松重建

海口驛在縣北一百一十里今廢

縣渚驛在縣南七十里今廢

橋梁

州

平橋在州治小廳前淳熙十五年宗守穎重建跨池為

屋左右植芙蓉

曾守幾有詩云浪說吾邦小清池
思有餘水風涼枕簟荷氣馥衣裾

客位經過少官曹簿領疎
良辰不行樂秋水落芙蓉

州橋一名南橋在州南八十步

順政橋一名東橋在州東六十步因門得名

學橋在州東南一百步

賣茆橋在州東二百六十步

狀元橋在州東一里陳侍郎公輔居之

永泰橋在州東一里小街直上

保寧橋在州東一里戶曹巷東

白塔橋在州東南二百三十步以其側有塔焉故名

悟真橋在州東北二百八十步舊名黃牛坊橋慶元三

年葉守範更今名

事見悟真坊

觀橋在州東北一里以近天慶觀故名

按慶歷七年元守絳建十石梁於河以通車馬詢之

故老謂今兩州橋觀橋學橋賣茆橋永泰橋保寧橋

其舊蹟焉餘則不可攷矣

臨海

中津橋在縣南一里脩八十六丈廣一丈六尺淳熙八年唐守仲友建橋之節二十有五籍舟五十規制闕續為一時壯觀先是城臨三津其中最要自甌閩道黃岩而度者肩摩袂屬至此每病涉橋成如履通衢顧以潮汐升降朝撞暮簸春水至夏秋雨溢暴流吞齧久則不支自紹熙元年江守乙祖慶元元年周守睦二年劉守坦之嘉定四年黃守留

六年余守建皆重修之劉更名慶元黃仍其舊十五年齊守碩逆防其壞大加密葺舟補舊者四十創新者十有四布版道二十有七鉤欄一百六十有二又以餘材別為舟五穴南岸藏之以備異時更易視舊蓋有加矣橋南有亭遇祝聖則於其地放生焉北有皇華亭世傳皇華真人上昇處南又

有飛仙亭

唐守記云郡介括蒼天台間水源二山東南流合于城西十五里東注于海城

臨三津其中最要道出黃岩引甌閩往來晝夜不絕招舟待濟寒暑尤病颶風無時隄師牟利弊舡

重載命寄毫髮仲友以淳熙庚子來守辛丑三月
常平使者循行迺于城南戊夜登舟篙工失度比
曉迺汔濟因問父老江可橋未作何故對以潮沙
升降經營為艱食於津與瀕江之市又沮之皆中
輟仲友自念承乏牧養繼歉歲入境人草食賴朝
廷勤恤斃麥告登病少瘳矣橋大利可毋作迺分
官吏庀工徒度高下量廣深立程度以寸擬丈創
木樣置木池中節水以筒效潮進退觀者開諭然
後賦役始於四月丙辰成於九月乙亥築兩堤于
皇華亭之東甃以巨石貫以堅木載護以留楫中
為級道兩旁為却月形三其層以綢水勢南堤上
流為夾木岸以受水衝堤間百十有五尋為橋二
十有五節旁翼以欄載以五十舟舟置一碇橋不
及岸十五尋為六棧維以柱二十固以捷筏隨潮
與橋岸低昂續以版四鍛鐵為四鎖以固橋紐竹
為纜凡四十有二其四以維舟其八以挾橋其四

以為水備其二十有六以繫筏繫鎖以石圍四繫
纜以石師子十有一石浮圖二纜當道者植木為
架遷飛仙亭于南岸遷州之廢亭于北岸以為龍
王神之祠為僧舍及守橋巡邏之室二十有一間
南僧舍為僧伽之堂凡橋欄舟楫之役五邑共之
黃岩預竹纜之須餘皆屬臨海金木土石之工二
萬二千七百用州錢九百八十萬米四百五十斛
酒二百六十石橋既成因其地名之曰中津第賞
官吏有差燕犒以落之命臨海尉支監官主橋事
兩指使同視啓閉擇報恩寺僧行各二人奉香火
置吏屬行文書番將校主巡警邏者二人守橋十
有四人皆厚其廩給又以度數名物為圖志禁防
法守為要券田畝財用為版籍東湖歲輸公帑數
百緡改入焉以備葺費命臨海黃岩令董葺事所
以為橋計者粗備矣夫民可與樂成難與慮始方
議作橋則疑中則謗既成則疑釋謗弭而說繼之

是皆常情爾然慮始之難未若保之之難金石至堅久猶利而泐況他乎故記其大槩使後人知其勤尚或繼之且為銘曰台江之津憧憧往來橋之未作吾民其咨豈無智謀亦阻浮議橋之既成其勤在繼矜吾民兮閔吾勤
兮永詔厥後視斯文兮

懷義橋在縣東二里乾道六年向守洵建或云尉舒亶斬惡少於此又云僧懷義建故名

東留賢橋在縣東七里本茶院橋紹熙五年為徐守子寅建

西留賢橋在縣西二十里淳熙十六年為沈守作賓建

交禮橋在縣東三里

一作交鯉言因開元中蛇與鯉鬪而名又一作蛟鯉謂地臨江潁此

二魚所出也按祥符間大周鄉舊有交禮里則是
以里名橋其承襲必不謬前說稍誕後說則近俗
矣

通明橋在縣東三里以其路通四明故名後有十將鄭
者居之俗呼十將橋者誤

大固橋在縣東二十里一名雙橋濱溪舊多梅花

于公橋在縣東二十里

清化橋在縣東二十五里一名下林橋

下管橋在縣東四十里

五家橋在縣東四十五里

吉祥橋在縣西三里天禧中建以近吉祥寺故名乾道

六年亭其上

浮崗橋在縣西一十里

八疊橋在縣西二十五里

船坊橋在縣東南五里舊有船塢在東湖與今橋近舊

傳嘗造船於此故名

遂仁橋在縣東南二十五里一名欄界橋

節思橋在縣東南五十里舊傳有巫節其姓者建此故

名

東邏橋在縣東南一百二十五里

後嶺橋在縣西北四里舊名昇仙

重輝橋在縣西北三十里舊名柘溪橋

洪橋在縣西北三十里

黃巖

縣橋在縣南一十五步宣和五年建

利涉橋在縣北一里嘉定四年令楊圭建脩一百丈廣

三丈籍舟四十功利次中津南有黃山樓

水心葉侍郎適

記云嘉定四年二月黃巖縣浮橋成林肅叔和為其知縣楊君言曰橋長千尺籍舟四十欄箇絳索隄其兩旁捆圖後狻訖三十旬斤鐵九千木石二萬五千夫工六萬餘縣東南車馬擔負而客之塗皆達於橋西北樵採攜挈而民之市皆移於橋諸公跨天台陟鴈宕行過黃巖皆喜曰增一橋矣蓋奔渡爭舟傾覆蹴躅之患既免而井屋之富塵肆煙火與橋相望不絕甚可壯也古無而今有難也橋於江之險又難也台州有橋自唐守始君一縣作之抗其力如州倍難也願子記以為君酬余病

未暇也叔和又言曰橋以未成為難衆人所知爾以既成為難君所自知也今歲別一周以待異日之闕尚懼不足雖然縣籍壤七十年矣君聚田百萬畝筭而步析之更二載始得經界之舊君之力雖尤難而承其後者易矣易則思思無窮而橋可恃以常存也願并著之余卧水心久往來皆村野人語不到門外不知君材迥若是鄭大夫非異人耶舉鄭國解落整比大效小驗具於春秋至捐一車則天下以為笑彼漆洧之易視今之難奚百倍翅耶豈古人於此則或有故歟世常言極今人所難不足以進古人所易而充古人所易不能為今人所難何哉叔和之論不余質也可無為書余少從叔和兄弟游每為余言縣直北山爽氣浮動花柳之麗雪月之勝無不在江北余間至程頭必徘徊顧瞻輒阻江而返屢矣今既施橋而叔和與邑人日曳杖娛戲於北山潮生汐落隨江降升悠然

如泳漢浴沂以歌令君之遺德而余已老不復有
四方之事徒慨想而不能從也因附見之亦以志
余之不忘

斯游爾

孝友橋在縣西一里脩六十丈廣三丈跨大江別浦元
祐中令張元仲累石為之元仲字孝友因以名橋
慶元二年圯于水縣人趙伯澣糾合重建築為五
洞橋面亦五折取道當中坎兩旁以竅水翼欄其
上視舊功十倍焉今但呼西橋

永寧橋在縣東南五十步建炎二年建

桂枝橋在縣東二里左琿居之紹興二十八年建

魯神橋在縣東南五里

新羅坊橋在縣東北一里即清水閘橋

東浦橋在縣東北一里二十步即混水閘橋

錢家橋在縣東南二百五十步一名永利橋

東禪橋在縣東一里

邨家橋在縣東南二百步

浮橋在縣南三里

三童橋在縣西二里

新橋在縣東三里

德勝橋在縣東南三十里宣和中建以勦寇于此故名

石秋橋在縣南八里

寺家橋在縣東南一十里

成浦橋在縣北七里一名陳晏橋

淨土橋在縣東北一十里

新城橋在縣西北一十里

塌水橋在縣西北一十里

下仙浦橋在縣東北一十里

桐嶼橋在縣南二十里

東鑒橋在縣南二十里

下浦橋在縣西南五里

下洋山橋在縣南二十五里

柵涇橋在縣東南二十五里

馬鋪橋在縣南二十五里

苦竹橋在縣西二十五里

龔嶼橋在縣西南二十五里

錢嶼北橋在縣南二十五里

上龔橋在縣東一十七里

錢嶼南橋在縣西南五十里

新安橋在縣東南三十里一名路橋

小澧橋在縣西三十五里

石路窟橋在縣東南三十七里

長浦橋在縣東南四十五里

清洋橋在縣東南四十里

大浦橋在縣東南四十二里

下新橋在縣東南四十五里

新湫涇橋在縣東南四十九里

澤庫橋在縣南四十五里

新橋在縣南四十五里

丹崖橋在縣南四十五里

編嶼橋在縣南四十五里

洋嶼橋在縣東南四十七里

新瀆橋在縣南五十里

驚嶼橋在縣南五十里

聚石橋在縣南五十里

鳳城橋在縣西五十里

下盈橋在縣西南五十里

白塔橋在縣西南五十里

三嶼橋在縣西南五十里

關嶼橋在縣南五十里

溪口橋在縣南五十里

新涇橋在縣南五十里

安容橋在縣東南五十七里

白峯橋在縣東南五十五里

夾嶼橋在縣東南五十里

光明橋在縣東南六十里

月河橋在縣東南六十里

回浦橋在縣東南六十里

新湫南橋在縣東南六十里

應田橋在縣西南五十里

橫嶼橋在縣南七十里

樓崎橋在縣南七十里

湖亭橋在縣東七十里

馬巷橋在縣南八十里

黃山頭橋在縣東南一十五里

莊土橋在縣南三十一里

涇土橋在縣東南四十九里

小嶼橋在縣東南七十里

長嶼橋在縣南八十里

朱村橋在縣南八十里

鷄鳴橋在縣南八十里

塘下橋在縣東南八十里

涓湖橋在縣東南八十里

下湖橋在縣東南九十里

天台

臨川橋在縣西一里舊名西橋隆興二年令王琰累石

而建且亭其上陳知院騷以琰臨川人也故名

陳知

院記云臨川王公琰紹興三十二年春館一銅章綬以荆國文公濟天下之緒餘濟天台越隆興元年冬十月甲戌新作橋於邑西之谿從民欲也谿距邑庭可一里源自五峯雙澗北迤而至衆山複迷傍流轉委會霖潦則激焉如轟湧焉如奔防隄室廬蕩如也平時馬涉則濡纓負涉則濡橐聯釣

以渡歲作歲圮編吐苦其役行李咨怨前後尉李
琰李異俱有建橋之役作百丈堤以捍衝溢功竟
弗濟後為令者睥睨難之迨公之來嘆曰大害也
不在我乎大抵銳於土功者利在亟成以要虛名
肯為遠計今我則否迺會費五百萬錢出俸四十
萬為邑人源源而應數則充矣爰即故址相之然
後奠之奠之然後營之斲者鑿者陶者埴者裡者
築者從焉非驅作焉非督公曰有穡事者與乎有
焉毋納其力穹石以為楹植之屹如也巨木以為
梁橫之妥如也壁以培石欲其埤也灰以塗壁欲
其確也尺有五十何其脩之漫漫然尺一十有九
何其傳之衍衍然尺二十有五何其高之岌岌然
復亭其上迺舄迺飭迺敞迺奕可以息行邁可以
樂閒暇可以遠眺望卓哉美乎疑混物初剖有此
壯觀非人力能為也二年閏月丙辰告成公迺率
僚友會稽陸君洎金華陳君恕永嘉丁君康時池

君虞卿觀焉公曰吾與諸君既作於斯僉曰大夫之力也名則在大夫士之豪民之耆老于時咸在翕然告曰願即以臨川名表公功也詩既獲遂歌以落之曰壯兮滄溟跨蛟龍麗兮霄漢垂螭螭疑若有神施磨礧輦然不動如華崧環瞻山幄疑翠空俯瞰谿谿紋纖微風夜半橫浮沆瀣中朝來岷應扶桑紅車馬颯沓西復東宏規碩利繁誰功競將大年壽我公願與此橋俱無窮

孝義橋在縣東九十二步淳化元年建因坊得名

螺溪橋在縣東七里景德三年建

石井橋在縣東一十三里咸平五年建以其旁有石井

故名

靈水橋在縣東三十里淳化三年建

或引孫綽賦過靈溪而一濯之句非

也綽所賦蓋福聖觀前之溪爾

茅橋在縣西二十里舊名通濟後以地多茅姓更今名

羅提刑適未第時嘗露宿橋上後持節經從有詩云京城闕遺相知心繞天台四散飛記得小田

橋上月五更荷露濕人衣今斷碑尚在

永寧通濟橋在縣西二十里父老云本鍾氏所勑或呼

鍾家橋

丹霞橋在縣西一十五里以近丹霞洞故名

飛泉橋在縣西二十里蓋取孫綽賦瀑布飛流而名

振錫橋在縣北一十里國清寺東舊名東橋後寺僧亭

其上以水聲如振錫更今名

豐家橋在縣東二里其水自螺溪分流昔僧豐干祖居

處也

清河橋在縣東一十五里

洪橋在縣東七里以地多洪姓故名

從化橋在縣西一里

迎賓橋在縣西三里

清化橋在縣西五里

碧水橋在縣西一十五里舊名碧泉

清溪橋在縣西北五里

落馬橋在縣西北七里

仙居

縣橋在縣治前景德四年建

白水橋在縣東一百五十步嘉定十六年重建以溪水

白色故名

迎恩橋在縣東六十五步舊名東河橋嘉定元年令姚
偓重建以嘗迎詔書於此更今名

市橋在縣西一百三十步景德四年建以其處市中故
名

石井橋在縣西一十里嘉定十四年重建

慶雲橋在縣東一十里純熙觀慶元元年建以其有慶
雲之瑞故名

社橋在縣西二里以其處社壇側故名上有傾蓋亭

杜橋在縣西三十里以邑人杜氏建故名

彭溪橋在縣東二十里以其接彭水故名

板橋在縣西四十里建炎中改甃以石云

鳳仙橋在縣西六十五里

新坊橋在縣西五十五里

廣業橋在縣西六十里

長橋在縣南二里以其水自孟溪入大溪故名今廢

苦竹橋在縣西五里以其側多植苦竹故名

斷坑橋在縣東一十五里今廢

寧海

縣橋在鼓樓前五步

桃源橋在縣東一百九十步夾岸多桃花舊傳水之源

出天台因取劉阮事而名北有放生池

廣度橋在縣東八十步

過遠橋在縣西二十五里崇福寺西

羅提刑適有憶西橋寄昉師詩云長

憶西橋避暑時天風六月襲人肌水隨地脉來無盡雲過山頭去不知拂岸稚松應偃蓋當年游子已龍眉憑師莫動溪邊

石留待東歸題好詩

桐山西橋在縣東北二十里因山得名嘉祐八年縣人

應宗貴累石而建

羅提刑適為之記

後壞淳熙十二年民

張潭仍架木為之

唐守仲友為之記

三界橋在縣西溪南五里

道士橋在縣東北五里舊以天慶觀在焉故名

十二保橋在縣西北四十里

石广溪橋在縣北七十里

摘星橋在縣南二十五里摘星嶺下

白嶠橋在縣東五里

黃塢橋在縣東南一十里

海游橋在縣南六十里因地得名今廢一名新市橋

泗洲橋在縣西三里

通德橋在丞廳前五步今廢

橫塘橋在縣西南六十里吳越時葉太傅景泰七世孫

建俗呼葉家橋今廢

新市橋在縣西南六十里今廢

津渡

臨海

邵家渡在縣東北二十里

蓮盤渡在縣東南一百二十里

上广渡在縣南九十里

家子渡在縣東南一百二十里

柵浦渡在縣東南一百二十里

關

頭渡在縣東南七十里

關

山渡在縣東南六十里

石仙渡在縣東南六十里

西岑渡在縣東南六十里

磧村渡在縣東南四十里

涇山渡在縣東南一十五里

三江渡在縣西一十五里

中渡在縣東南一里

西渡在縣西一里

冷水渡在縣東南三里

三十六渡在縣東二十里西自潮際東至小芝凡三十

有六節故名

關渡在縣南一十五里

下渡在縣東南二里

小石渡在縣西五十里

邵家渡在縣東三十里

仙人渡在縣西三十里

曹菴渡在縣西五十里

黃巖

磊石渡在縣東南一百里

黃林渡在縣東北五里

白石渡在縣東北一十里

斷江渡在縣西一十七里

西浦渡在縣西門外後以建利涉橋廢

江亭渡在縣北一里後以建西橋廢

天台

澥渚渡在縣東一十里始豐水出於此其清如紺碧焉
杜潭渡在縣東二十五里與臨海分界

溪南上渡在縣西南一里

溪南下渡在縣南一里

曹家岩渡在縣西三里

仙居

清口渡在縣西南八里

石井渡在縣西一十五里

趙塢渡在縣南五里

櫟溪渡在縣西三十里

石牛渡在縣東八里

韋羌渡在縣西三十五里

河頭渡在縣南三里

廣業渡在縣西六十里

寧海

亭渡在縣東二十五里

柿畧渡在縣東一十里

砂碕渡在縣北五十里

王公渡在縣北六十里

練蛇渡在縣南八十里

上白溪渡在縣西四十五里

即狐嘯
溪渡

下白溪渡在縣南一十五里

沙頭渡在縣南一十五里

浮溪渡在縣北四十里

夷吾渡在縣西一十里

海游渡在縣南六十里

赤城志卷三

欽定四庫全書

赤城志卷四

宋 陳耆卿 撰

公廨門一

先聖廟社稷壇非公廨也首之者何也社稷主此土而先聖主此道無此道則無此土矣無此土而欲治此土得乎先廟次壇示有本也若學宮與貢院則為國造士教場則為國簡兵士以宣道業善治兵以昭威銳讐不軌文武二柄畧具故不敢混諸官舍而附於廟社之後

庶覽者得詳焉

先聖廟

州

廟在州東南一百步康定二年李守防即廟建學初廟在州治後景祐二年范守說徙東城之維時未建學也李守既建學於其東得故版掾舍遂以錢易之復遷廟焉自是廟學一新矣皇祐二年呂守士宗創屋五十楹尋壞紹興十九年宗守穎三十一

年黃守章乾道元年黃守然七年朱守江皆重修

之淳熙七年唐守仲友始大修更戟門兩廡及齋

舍紹熙元年江守乙祖闕縣學宗學

先是趙守汝愚欲建學未

果至江始成之

慶元五年葉守甄奉旨闕武學惟大成殿

久欲壓歷三政不果造造於開禧元年葉守燮殿

之後有明道堂堂之上有稽古閣閣之後有直舍

有上職事位七諸生齋六

伸道敏行潛心居仁尚友育英

有肅儀

位祭器司計二庫而庖湍之屬不預焉蓋大綱畧

具矣嘉定四年黃守備作櫺星門又為兩夾室易

州學額創小學

以三十人為額置教諭一員食減半

增大學生食又

捐錢買田造祭服祭器先是尤守表立思賢堂

祠畢

文簡公士元章文簡公得象元章簡公絳皆舊侯有惠政後至宰輔者也

三老堂

祠羅提刑

適陳侍郎公輔陳詹事良翰

皆鄉之名德後進尊慕者也

後有頌僖堂

祠宗守穎黃守

章朱守江唐守仲友江守乙祖皆有功於學者也

有謝丞相祠至是復建

四先生祠

濂溪周先生惇頤明道程先生顥伊川程先生頤晦菴朱先生熹

謝上

蔡祠

因上蔡子孫流落于此召至給官帶月廩其母子四人有差仍買田俾奉祭祀遂又立此

祠於思賢頌僖益二位

趙忠定公汝愚黃守然

諸祠多遷徙

嘉定十三年趙守彥紆合建于明道堂之東偏仍更造直舍十五年齊守碩重造櫺星門葺衆齋修

祭器一千二百學之庶務可謂畢舉矣

唐守記云本朝以恢

儒為家法自慶歷訖紹興命教益廣太上皇帝首善輦轂款謁臨幸親勒石經以風厲學者聖主服慈訓復舉編典橋門觀聽益盛肇建華閣嚴奉奎畫增飾黌舍輪奐一新教風所被無間幽遠矧在甸服敢不欽承仲友世以諸生受國恩淳熙庚子奉命假守歲丁大侵夙駕至郡既謁先聖行視學宮將就傾圯惕然念非宣化所宜顧民艱食事有叙既登麥命臨海令葺大成殿易腐竝罅堅綴

可久至秋中熟乃議修學闕庭高門崇垣修廡論
堂書閣因舊而葺鳩工度材慮吏並緣乃集鄉之
搢紳推其賢能者三人庀役事擇僚屬四人助之
以吏卒謹飭者行文書給呼召如作私室官不知
役始作於壬寅孟春畢于首夏庭宇夷直規制宏
壯悉過於舊材良匠能可支百載夫以天子命郡
置學選明師教士以德行道藝以培植風化震蕩
習俗使人知有禮義以胥訓胥保於平康輯睦之
地乃王道之本生民之命不可一朝緩養薄則不
足移體居陋則不足移氣青衿挑闔而不遜業則
風俗之苟簡熟爛至於扞格而難入無怪也茲郡
適辟雍之流而以水火風旱之相仍補敗不給顧
視嘆咨以迄于今又因循而不修守之罪大今捐
數千緡而賢士大夫樂與共成豈獨守之責塞實
亦成前人之志副多士之願然鄉之賢士大夫陽
其心力而守蒙成此非天子之德厚而朝廷之化

深與喜其成而推其本言之不足而至於咏歌詩
其可無作詩曰有學之宮既久斯圯匪鄉之英孰
葺而起伊鄉之英匪為我勞辟雍之化其流涵涵
有廡斯脩有門斯開多士復來居移氣壯台山巍
巍江流逶迤有學之宮與江山齊既安爾居既鼓
爾篴青青子衿曷孫爾業我風斯移我俗斯美詔
爾多士毋負于天子 劉尚書燾四先生祠堂記
云嘉定五年春正月天台郡學始建四先生祠郡
侯豫章黃潛使來言曰故侍講文公朱先生道為
世師台之士受業於其門者衆淳熙間浙東大饑
詔起先生為常平使者部內賴以全活而於台人
櫛垢爬癢為德獨厚蓋嘗比屋設位而祝之盍祠
于學宮然先生之道濂溪周先生伊洛二程先生
之道也故祠四先生焉庶幾邦人有所嚮慕而興
起顧子有以發其端燾惟黃侯因邦人懷先生之
德而欲慰其思復推原先生學道愛人之所自出

以風厲之其於化民成俗之意篤矣然四先生之道孔子孟子之道也今學者孰不曰師孔孟得其言孰得其所以言不入於清虛則溺於淺陋本原不正末流益遠是以義利不明習俗以壞儒者遂可厭薄天下不復見治古盛時然則長民者盍亦反其本矣今侯之牧其民也芟夷暴彊封植善良政既行矣侯曰未及乎德禮也乃建是祠率諸生而舍菜焉執事以序雍雍如也禮成而退有進而言曰先生之容則既瞻而仰之矣先生之道可學而至乎侯曰善哉問吾嘗聞之維皇上帝降衷于民本然之性無不善也學者窮理以致其知反躬以踐其實則施之家而順達之國而理措之天下無所處而不得其當乃若趨其名以為高入乎耳而出乎口則非四先生之所望於後學也余既嘉侯之為邦知所本而其所以教人者又親切而著明可尚也已於是乎書

水心葉侍郎適上蔡祠

堂記云謝良佐字顯道受業二程與游酢定夫楊時中立皆為高弟號上蔡先生學者宗其傳謂顏冉復見也不幸遭黨人禁錮未解而卒諸子避冠送逸一死楚一死閩獨克念者落台州紹興六年給事中朱震子發奏官之尋亦死克念有子偕三子無衣食替人承符引養老母嘉定五年太守黃留子耕修郡志訪求故家得之請見抗賓主禮給冠帶錢米買田宅祠顯道于學在二程後郡人驚異曰自黃太守來他日邦賦之沒于羣姦者一收斂公使之消於妄費者悉減節遂能以其餘興小學作橋星門增太學生食服有珩鞞器有蠹簠又設燭火立養濟葬叢骸政通化達生死潤賴此吾等所知也惟上蔡事不可解甚或嗤笑曰奚不切若是哉夫意有遠近知有難易詩曰烝我髦士近也又曰續古之人遠也興小學近而易知也祠上蔡遠而難解乎道非人不行不行而天地之理不

章古今大患也先王比隣閭附而教其人不敵薄也然其致道而成材者幾絕都曠國不一遇焉故尊之貴之珍之重之哀其死也尸祝以神之祿位以延之更世千百猶未也蓋公之也若使人奮其私智家操乎異說各不相統而以己之氣血所勝者為善則道德壞而義理滅矣解子耕之舉者宜曰獨上蔡事尤長非不切也肯正考父饁粥於鼎循牆而走其後孔子生而孟僖子命其子學禮焉謝氏之困於庸奴久矣子耕既洗沐之列於士大夫安知無達人出復佐二程之道斯可以占天意矣然則余之不切不愈甚乎又三老先生祠堂記云學者聚道之地而仕所由出也或畔道從利苟榮其身欲復於學弗可受矣況可祠乎台州之學得祠者三人羅提刑適陳侍郎公輔陳詹事良翰提刑用不究故事不顯余聞鄒浩言熙豐外貴人視民甚蒿萊芟燎恨不力也是時能慷慨建白

保赤子以對天命惟江都令羅適弋陽令董惇逸
二人而鄒公獨謂羅公見而得之然則推於所不
見而不畔道審矣方靖康憂恐懲艾已泮豈不尚
合侍郎發明四肢心腹之論無過此矣竟失指遠
去然後彷徨宗周卒成分裂之禍及隆興英睿憤
激大勢宜若遽振詹事力守絕和不棄地之策最
專一也使堅忍待之敵久當蕩析豈遺種至今哉
雖紹興復用而已與大臣異議終不留雖乾道再
入而既為近習擅事迄自退二公任諫諍位從官
立朝本末天下誦之豈惟不畔道而固行道道雖
難行而不苟榮其身而止也士在天地間無他職
業一徇於道一由於學而已道有伸有屈生死之
也學無仕無已始終之也集義而行道之序也致
命而止學之成也後世地或千里無學其君子以
意行道晚進闊遠不知所從慶歷後名一功著一
善往往復之於學矣今其秀人美士羣萃而校處

欽定四庫全書

卷四

朝夕瞻顧拂拭像服如三老之存春秋盥薦饗醴
芳苾如三老之饗而又仰其大節俯其細行無不
皆可師也為聚道之助不既多乎或疑侍郎不右
移公學術若少異然按程公親為孔文仲排劾而
與孔公並黨籍史記晏嬰非孔
子而論語稱善與人交兩賢哉

臨海

廟在縣西南二十步景祐四年令師道即廟建學崇寧
中學徙附于州後廢廟經乾道九年火淳熙二年
趙守汝愚復新之

黃巖

廟在縣南二百步舊在縣東三里治平三年令許懋即
廟建學元豐六年令翁仲通徙今地宣和二年燬
于寇五年令王然重建開禧元年火二年令趙湜
又新之嘉定九年令陳夢建作直舍

天台

廟在縣東南二百步舊在縣西南四十步皇祐中令石
牧之即廟建學後三徙至今地淳熙中令趙公植
作廊廡齋廬嘉泰二年令丁大榮重新之嘉定元

年令詹阜民創明倫堂上為尊經閣十一年丞陳

達重建大成殿

學前瞰溪其流舊釀為三古識云三水共一流此地出公侯先是舉

人多折北紹興二年大水其流適合自是舉不乏人云陳密學襄記云孔子聖人之大備者也使得百里之國以為政於天下雖堯舜不可及已為天子者不以有已聽命以治其天下為諸侯者不以有已聽命以治其國則必期月而為東周矣惜乎天民之不遇命也自唐以來天下郡縣始立孔子廟追尊王爵春秋釋奠天子以下皆執弟子禮世以為尊用孔子之道如是豈其然也生而有盛德於民死以祭禮報之如曰尊用其道則未也天下之文弊久矣自周迄于今宜黜浮偽尚忠實百物或有失職者宜正名王澤或有壅滯者宜任大臣遠邪佞官政或有冗濫者宜進官之賢者以黜

不賢者若夫教或有未至者宜興立學校隆師儒
禮或有未修者宜教民冠昏喪祭樂或有未作者
宜攷五聲十二律放鄭衛豪傑或有未出者宜拔
賢材舉逸民鰥寡孤獨或有未養者宜弛力舍禁
授田以制取財以節民之蠹或有未去者宜黜佛
老夷狄之患或有未備者宜足兵孔子之道用之
則必先於此數者夫能立廟以守其祭祀尚未為
得禮者而況於用乎天台縣有孔子廟不修縣令
石牧之始至歲十月相縣之東南隅大作新廟為
屋總六十有二楹先植正殿塑孔子南鄉左右十
哲曾子自餘門弟子六十有一人與諸儒傳經者
二十有一人皆圖之壁間各以其所追爵等降如
周之服冕圭璧惟孟子荀况揚雄韓愈氏服儒服
焉中立講堂圖古之輿服禮樂之器於其兩壁間
又設學舍生師講習咸有位序祭器在西房庖厨
在東房周回門廊環以墻宇又考古器作籩豆簠

簋樽壘俎爵之屬十二月廟成明年春秋釋奠入而行禮生徒興事品物如制像圖尊嚴籩俎新嘉神明燕喜人物觀化先茲邑民不識儒學又故廟湫隘與民雜居侮慢不尊至是耳目開覺始有學者嗟乎石君可謂有志矣區區一小邑而能為孔子立廟制度以禮春秋以時祀之俾民不忘是以無愧於心如其欲用孔子則天也非力之所能及也天其不欲以斯道覺斯民也則亦已矣乎如欲以斯道覺斯民也石君之志其必有遇矣

仙居

廟在縣東五十八步皇祐初令陳襄即廟建學初天聖中令陳戡止建廟襄既建學且為文勸誘學者宣

和兵火廟獨存淳熙七年以風雨摧壓令莫洗新
之十一年令徐枬重建學嘉泰二年令林岳復加

密葺嘉定元年令姚倬創明倫堂櫺星門

周丞相必大記

云孔堂高第猶分四科性與天道未嘗輕言世之
學者乃欲德行言語政事文學兼而有之其不可
得而聞者每求於議論之間往往名是實非言出
而躬不逮此今昔通患也古靈先生陳公諱襄字
述古福州侯官人時方以雕篆為學獨與陳烈周
希孟鄭穆倡道海濱鄉人化之號四先生皇祐中
令台州之仙居篤意學校首為文勸人讀書次諭
以禮義之俗又擇明經之士朝夕講說詢問大義
間習程試高不蠟等卑不流俗示之以方期造於
道而進取亦在其中士民懷之奉祀今百五十餘

年嘉泰辛酉夏通直郎四明林岳來治茲邑歆慕
前哲凡庠序堂廡門觀舉新之厥初祠宇庠下遷
寘中門之右極其嚴潔刻公遺文二十五卷得謝
雨詩於斷碑增寘集中學有射圃淪棄榛莽亦加
葺葺別市民居勑觀德亭總為錢千二百緡皆出
節用籍贓田十八畝輟務場餘財月萬錢以贍給
生員請尉簿嘉禾錢撫專主教導於是學職林宓
呂咸陳穎王杰不遠二千里以記為請夫教人必
以聖人為師古靈學夫子者也林君希古靈者也
學者誠能各因其材孜孜弗怠尊所聞而行所知
豈特無負賢令亦將無負先聖可不勉歟按國史
古靈傳惟載其宰河陽典數郡所至必務學校而
令仙居則畧之是
尤不可以不書也

寧海

廟在縣西南二百步舊在縣東一里祥符五年令蘇季

成即廟建學嘉祐四年徙縣驛側紹聖四年徙縣

治東南紹興六年令錢竣徙今地慶元三年令趙

笈夫重建廟有麗澤棠憩詠歸三亭

建學時有日者云山蟠水

聚人物之鍾也然當鈍滯一甲子近世人士浸盛咸以為驗焉

社稷壇

州

壇在州西南六十步政和中李守春卿建時知襄州俞

惠奏言州縣壇壝率不如式乞按今格為圖下諸
州以故李守倣行之歲久圯近舍肆侵淳熙六年
沈守揆命臨海令彭仲剛撤而新之得仆碑土中
蓋政和所頒式也其制橫列三壝門各四出中立
社稷東風師西雷師雨師總為五壇壇高二尺五
寸外為燎壇視他壇稍高遂悉倣其舊增築之有
屋四楹為視饌更衣所又創其一為齊潔之地其
涂北出表以二柱中建門嚴鑰以守之其制備矣

嘉定三年火黃守當重新之

樓參政鑰
為之記

臨海

壇在縣西南一百步淳熙六年令彭仲剛重建

黃巖

壇在縣西南二百三十步嘉定十四年令林士遜重修

天台

壇在縣南一百步嘉定元年令詹阜民重建

仙居

壇在縣西三里政和元年建

寧海

壇在縣西二里慶元元年令李知微重建

貢院

貢院在巾子山北乾道七年朱守江建南渡初應書士未盛故以州東三百步今韓運判宅址為之後徙

兜率院

按今藏殿柱間刻云終場三千人

院据山腹陟降不勝病

遂徙今地有監試位一考試位六後有亭曰舉秀

為會攷之地重廡參錯為屋三百一十楹置試案

卷棚

先是人士各先輸案入試併請卷紛拏洶開上下病之今每屋一楹列三案案附柱長存一廡架二棚使坐其間者以關子附繩而上則卷子隨繩而下自是無失卷若案者二事他郡所無

也

自是應書者雖漸盛猶不過五六千人近歲至

八千人始於報恩寺截行者寮附盆之猶慮不能容嘉定十四年將大比齊守碩諏羣議相其東有福安廢院院後多隙土可縛屋有馬氏地闌之守併得其地通為三百八十二丈墾高塞卑建八廡

為屋七十三楹與正院第八廡通又益以福安餘
屋別為門以入且慮逕塗隘感待試者病西闢酒
務繚垣畫地為衢其廣四軌兩旁渠道亦以石甃
平之是秋應書者又多皆穩步散坐無他患先是
未有也樓少卿觀為之記解額舊制三歲五人崇寧中行
三舍法歲貢一人大比貢四人宣和中復科舉三
歲解八人紹興三十一年合流寓三人為十一人
以今終場數繩之幾於千取其一蓋與溫福等州

最號人盛員窄處士至奔迸易鄉貫去井邑求試
于漕臺于太學蓋亦勢所必至也儻均而廣之使
為士者不窘于較藝而又不重搖其心則豈惟一

郡之幸哉

先是試無常日士有詭冒取解數州者
紹興二十四年始詔天下例以八月十

五日
引試

教場

州

教場在州東北一里一百步紹興二十二年蕭守振建

有廳名奠發西有小廳為兵官彈壓之所東西二廡諸軍入隊或泊焉東有吏舍弓弩房嘉定四年

黃守留重修之易奠發為講武廳後創泊水為按

閱棲習之地作外門

按路分都監州都監皆以教閱為職循習既久止委之路

分路分憚於躬閱而州都監又縱不入則付之軍頭押教而已士驕而惰甚於他郡淳熙十二年江守乙祖奏乞以揀中禁軍六百人分十二隊俾三都監一押隊各總其三日親閱習總其路分知通月一拍試務在兵官盡職以

先是軍額多闕齊守

碩以次招補士為立碑

陳耆卿為之記

臨海

教場在縣東北四里尉廳西

黃巖

教場在縣東三里

天台


教場在縣東一十步

仙居

教場在尉廳東五步

寧海

教場在縣東六十步



赤城志卷四